



Los ntawm Thawj Tswj  
Hwm Thomas S. Monson

# Rov Qab Nrhiav Tau lub Hwj Huam ntawm Christmas

**N**tau xyoo tas los thaum kuv yog ib tug txwj laug hluas, lawv hu kuv nrog lwm tus mus xyuas ib lub tsev kho mob nyob hauv Salt Lake City foom koob hmoov rau cov me nyuam mob. Thaum peb nkag mus haud, peb pom ib tus ntoo Christmas uas muaj teeb ci ntsa iab thiab pom tej khoom plig uas tau muab qhwv cia hauv qab nws tej ceg ntoo uas nthuav lawm. Ces peb taug cov kev tsev mus ntsib cov me nyuam tub thiab ntshais—tej tug muaj ntaub qhwv lawv txhais caj npab los yog txhais ceg, tej tug muaj qhov mob uas tsis yooj yim kho—lawv luag nyav rau peb.

Ib tug me nyuam tub uas mob heev hu rau kuv tias, “Koj lub npe hu li cas?”

Kuv qhia nws kuv lub npe hu li cas, thiab nws nug, “Koj puas kam foom koob hmoov rau kuv?”

Kuv foom koob hmoov rau nws tas, thiab thaum peb tab tom yuav ncaim nws lub txaj mus, nws hais tias, “Ua tsaug ntau.”

Peb taug mus ob peb ruam, ces kuv hnov nws hu tias, “Auj, Tij Laug Monson, nyob zoo Hnub Christmas rau koj.” Ces nws luag nyav loj heev.

Tus me nyuam tub muaj lub hwj huam ntawm Christmas. Lub hwj huam ntawm Christmas yog ib qho uas kuv xav kom peb txhua tus yuav muaj hauv peb lub siab thiab hauv peb lub neej—tsis yog thaum lub caj no xwb tiam sis txhua lub sij hawm thiab.

Thaum peb muaj lub hwj huam ntawm Christmas, peb nco ntsoov txog Nws tus uas peb ua koob tsheej txog (Lukas 2:11).

Nyob hauv peb lub caj nyoog no qhov uas peb muab txiaj ntsim rau lwm tus yog ib qho tseem ceeb hauv kev ua koob tsheej thaum lub caj Christmas. Kuv xav tias tej zaum peb yuav tau zoo yog peb nug peb tug kheej hais tias, Tus Tswv xav kom *kuv* muab txiaj ntsim dab tsi rau Nws los yog rau lwm tus thaum lub caj uas muaj nqi no?

Cia kuv qhia hais tias peb Leej Txiv Saum Ntuj Ceeb Tsheej xav kom peb muab lub txiaj ntsim ntawm kev mloog lus rau Nws thiab rau Nws Leej Tub. Kuv kuj xav tias Nws yuav xav kom peb muab peb tus kheej thiab xav kom peb tsis txhob ua neeg qia dub los sis cuaj khaum los sis txawj sib cav, raws li Nws Leej Tub uas muaj nqi heev hais nyob hauv Phau Ntawv Maumoos:

“Kuv hais tseeb tseeb rau nej, tus uas muaj tus ntsuj plig ntawm txoj kev sib cav tsis yog kuv li, tiam sis yog los ntawm tus dab, tus uas . . . txhib neeg tej siab kom ib leeg sib cav npau taws rau ib leeg.

“Saib seb, qhov no tsis yog kuv tej lus qhuab qhia, txhib kom neeg tej siab npau taws, ib leeg nkaug ib leeg; tiam sis qhov no yog kuv tej lus qhuab qhia, kom tsis txhob ua tej yam zoo li ntawd lawm” (3 Nifais 11:29–30).

Nyob hauv lub caij nyooq sij hawm uas muaj txhij txhua, peb yeej muaj cib fim hlab thiab muab peb tus kheej rau lwm tus txhua lub sij hawm, tiam sis tej cib fim ntawd txawj ploj mus thiab. Niaj hnuv no muaj cib fim ua rau lwm tus zoo siab, hais lus siab zoo rau lwm tus, tej yam zoo yus ua tau, thiab muaj tib neeg uas xav tau kev cawm seej.

Ib tug uas paub zoo txog lub hwj huam ntawm Christmas sau hais tias:

*Kuv yog lub Hwj Huam ntawm Christmas—*

*Kuv nkag mus hauv lub tsev ntawm neeg pluag, ua rau cov me nyuam uas muaj ntsej muag daj qhib qhov muag loj, vim lawv zoo siab xav tsis thoob.*

*Kuv ua rau tus neeg qia dub xav faib nws cov nyiaj rau lwm tus ua rau nws tus ntsuj plig ci ntsa iab.*

*Kuv ua rau cov neeg laus rov qab ua li neeg hluas thiab luag raws li tau ua dhau los.*

*Kuv ua rau cov me nyuam lub siab muaj kev hlab, thiab ua rau lawv txoj kev tsaug zog muaj zaj npau suav zoo.*

*Kuv ua rau cov neeg uas xav ua zoo nce ntaiv nrog tej pob tawb uas puv nkaus, uas ua rau lwm tus xav tsis thoob vim muaj tib neeg zoo npaum li no hauv lub ntiaj teb.*

*Kuv ua rau tus tub ua txhaum cia li xav ib me pliang thaum nws ua tej yam tsis muaj nqi thiab xa ib qho me me rau cov uas hlab nws uas ua rau lawv zoo siab los kua muag—cov kua muag uas ntxuav tau kev tu siab mus.*

*Kuv nkag mus hauv tej lub tsev rau txim uas tsaus ntuj, ua rau tib neeg ua txhaum loj nco qab tias lawv txhaum li cas thiab ua rau lawv xav txog tej hnuv zoo rau yav tom ntej.*

*Kuv maj mam los rau cov neeg mob hauv lub tsev kho mob, thiab cov uas tsis muaj zog hais lus tshee tshee qhia tias lawv ua Vajtsuv tsaug.*

*Muaj ntau yam kuv ua kom tib neeg nyuaj siab ntsia saud pom Vajtsuv lub ntsej muag, thiab tau ib me pliang tsis nco qab txog tej yam me me thiab tej yam tsis zoo.*

*Kuv yog lub Hwj Huam ntawm Christmas.<sup>1</sup>*

Thov kom peb yuav rov qab nrhiav tau lub hwj huam ntawm Christmas—uas twb yog Khetos lub Hwj Huam.

#### **LUS CIM**

1. E. C. Baird, “Christmas Spirit,” nyob hauv James S. Hewitt, tus kho ntawv, *Illustrations Unlimited* (1988), 81.

## **QHIA LOS NTAWM TSAB XOY NO**

Thaum koj qhia Thawj Tswj Hwm Monson zaj lus no rau tsev neeg, cia li xav seb puas xav rov qab hais lo lus uas nws nug hais tias tus Tswv xav kom peb muab tej txiaj ntsim twg rau Nws los yog rau lwm tus thaum lub caij nyooq no. Yaum kom tsev neeg sau lawv tej kev xav thiab tej lub tswv yim (los sis, cia cov me nyuam kos duab) txog qhov uas yuav ua li cas “rov qab nrhiav tau lub hwj huam ntawm Christmas—uas twb yog Khetos lub Hwj Huam.”

## **COV HLUAS**

### **Hmo Ua Ntej Christmas Zoo Tag Nrho**

Los ntawm **Jerie S. Jacobs**

**T**haum kuv tseem loj hlob tuaj, qhov uas kuv nyiam txhua xyoo yog Hmo Ua Ntej Christmas. Kuv thiab kuv tsev neeg ua pizza, mus hu nkauj, ces koom ua ke hawm Vajtsuv thaum lub caij Christmas. Peb ua plaub lub suab hu nkauj thiab hu tej zaj nkauj Christmas nrov nrov thaum peb ntaus nkauj. Txhua zaus thaum hmo ntawd yuav tiav lawm kuv txiv yeej yuav qhia ib yam txog Christmas uas ua rau peb zoo siab los kua muag. Tsis muaj ib yam dab tsi zoo tshaj Hmo Ua Ntej Christmas.

Thaum kuv loj hlob tuaj me ntsis, kuv niam pib saib xyuas ib tug neeg zej zog tus me nyuam, hu ua Kelly. Kelly tuaj rau peb lub tsev txhua hnuv tom qab nws kawm ntawv thaum nws niam, Patty, ua hauj lwm. Kelly lawv kuv qab zoo ib yam li ib tug me nyuam aub—nws nrov thiab pheej xav tau tej yam. Kuv yeej zoo siab thaum Patty los koj nws tus ntxhais mus thiab cia kuv tsev neeg nyob kaj siab lug.

Muaj ib zaug thaum lub Kaum Ob Hlis Ntuj, kuv ntseeg tsis tau hais tias kuv niam caw Patty thiab Kelly koom peb thaum Hmo Ua Ntej Christmas. *Kuv* Hmo Ua Ntej Christmas. Kuv niam luag nyav thiab hais kom kuv txhob txhawj hais tias, "Yeej yuav tsis hloov ib qho hlo li." Tiam sis kuv paub tias yuav tsis yog li nws hais. Nkawd yuav noj tag nrho peb cov pizza. Kelly yuav thuam peb thaum peb hu nkauj. Kuv xav tias yuav muaj Hmo Ua Ntej Christmas tsis zoo hlo li.

Thaum txog hmo ntuj, Patty thiab Kelly los koom nrog peb, thiab peb sib tham thiab luag thiab hu nkauj. Kuv niam hais yog lawm. Txhua yam yeej zoo tag nrho. Thaum ib tag hmo nkawd ua peb tsaug thiab peb sib ncaim. Thaum kuv pw kuv lub siab puv npo. Kuv kawm tias tej txiaj ntsim uas muaj nqi tiag tiag hauv lub caij Christmas yeej tsis ploj mus thaum yus muab faib nrog lwm tus. Tej txiaj ntsim ntawd haj yam zoo thiab loj tuaj thaum peb muab rau lwm tus.



Kev Ntseeg, Tsev Neeg,  
Kev Pab

# Mus Saib Xyuas tom Tsev, ib txoj Hauj Lwm Cawm Seej

*Ua tib zoo thov Vajtsuv kawm tej yam no thiab, thaum tsim nyog ua, sib tham txog tej no nrog cov viv ncaus uas koj mus xyuas. Siv tej lus nug no pab koj txhawb koj cov viv ncaus lub zoo thiab ua kom lub Koom Haum Niam Tsev muaj feem hauv koj lub neej.*

Qhov mus saib xyuas tom tsev ces mus cib fim cov rau poj niam saib xyuas, pab ntxiv dab zog, thiab qhia ib leeg rau ib leeg—nws yog ib txoj hauj lwm cawm seej tiag tiag. Los ntawm kev mus saib xyuas tom tsev, cov viv ncaus sawv tus Cawm Seej cev pab cov poj niam npaj txais cov koob hmoov ntawm txoj sia nyob mus ib txhis.

Tus Thawj Tswj Hwm Spencer W. Kimball (1895–1985) hais tias, “Peb yuav tsum ‘ceeb toom, piav, ntuas thiab qhia thiab caw [lwm tus] kom los cuag Khetos’ (D&C 20:59), raws li tus Tswv hais nyob hauv nws tej kev tshwm sim.” Nws hais ntxiv hais tias, “Nej zaj lus tim khawv yeej yuav pab nej ua li ntawd.”<sup>1</sup>

Thaum peb cov uas mus saib xyuas tom tsev kom peb txoj kev txawj ntse txog qhov tseeb ntawm txoj moo zoo loj tuaj, peb tej zaj lus tim khawv txhawb nqa cov viv ncaus uas npaj ua kev cai raus dej thiab txais kev pom zoo. Peb pab cov mej zeej tshiab muaj zog ntawm txoj moo zoo. Qhov uas peb mus xyuas tib neeg thiab hlub lawv pab “kom cov uas tau tawm ntawm peb mus rov qab los [thiab] ua rau cov uas tsis tshua ntseeg txoj moo zoo lawm rov qab muaj siab ntseeg.”<sup>2</sup> Thiab peb yaum kom cov viv ncaus los cuag Khetos los ntawm qhov uas lawv mus rau lub tuam tsev.

Thawj Tswj Hwm Kimball hais rau cov poj niam uas mus saib xyuas tom tsev hais tias, “Nej yeej yuav cawm neeg txoj sia, thiab tej zaum cov neeg uas muaj siab ntseeg hauv lub Koom Txoos hnub no mas lawv muaj siab ntseeg vim nej tau mus xyuas lawv tom tsev thiab ua rau lawv muaj ib lub zeem muag tshiab. Nej ua rau lawv pom kev. Nej ua rau lawv pom tau deb dua li qub. . . .

“Nej tsis cawm cov viv ncaus no txoj sia xwb, tiam sis tej zaum nej kuj cawm lawv cov txiv thiab tsev neeg txoj sia.”<sup>3</sup>

## Los ntawm cov Vaj Lug Kub

Doctrine and Covenants 20:59; 84:106; 138:56

## Los ntawm Peb zaj Keeb Kwm

Thaum tus Yaj Saub Yauxej Xamiv txhim tsa lub Koom Haum Niam Tsev, nws hais tias cov poj niam yuav tsum tsis txhob saib xyaus cov neeg pluag xwb tiam sis lawv kuj yuav tsum cawm neeg txoj sia. Nws kuj qhia hais tias cov poj niam hauv lub Koom Txoos muaj tej luag hauj lwm tseem ceeb nyob hauv Leej Txiv Saum Ntuj Ceeb Tsheej txoj kev cawm seej.<sup>4</sup> Thaum peb ua raws li tej ntsiab cai uas tus Yaj Saub Yauxej Xamiv qhia, peb cov viv ncaus nyob hauv lub Koom Haum Niam Tsev yuav ua hauj lwm

ua ke npaj cov poj niam thiab lawv tsev neeg txais tau Vajtsuv cov koob hmoov zoo tshaj plaws.

Tus Yaj Saub Brigham Young (1801–77) hais tias “Cia peb ib leeg muaj siab hlub ib leeg, thiab cia [cov uas] muaj zog ua tib zog txhawb nqa cov uas qaug zog kom lawv muaj zog zuj zus tuaj, thiab cia cov uas txawj pom kev coj cov neeg dig muag mus txog thaum lawv pom kev lawv tus kheej.”<sup>5</sup>

### LUS CIM

1. Spencer W. Kimball, nyob hauv *Daughters in My Kingdom: The History and Work of Relief Society* (2011), 116.
2. Eliza R. Snow, nyob hauv *Daughters in My Kingdom*, 83.
3. Spencer W. Kimball nyob hauv *Daughters in My Kingdom*, 117.
4. Saib Joseph Smith, nyob hauv *Daughters in My Kingdom*, 171–72.
5. Brigham Young, nyob hauv *Daughters in My Kingdom*, 107.

### Kuv Yuav Pab Li Cas?

1. Lub Koom Haum Niam Tsev pab kuv li cas npaj txais cov koob hmoov ntawm txoj sia nyob mus ib txhis?

2. Kuv yuav ua li cas kom cov uas kuv saib xyuas txoj kev ntseeg loj tuaj?

Kom tau ntaub ntawv xov xwm ntxiv, cia li txuas rau [reliefsociety.lds.org](http://reliefsociety.lds.org).

© 2012 Los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam tawm ua lus As Kiv: 6/11. Pub txhais ua lus Hmoob: 6/11. Kev txhais *Visiting Teaching Message, December 2012*. Hmong, 10372 295